

豐城縣志卷之八

名宦

政在親民端推循吏民之思之匪僅才智寧拙催科而勞撫字存保障功絕囊橐累下而閒曹矯矯自異佐縣有稱率士無愧遺愛實多感恩最易俎豆馨香不輕位置吏于豐者代留善治敬著簡編後來是企志名宦

晉

雷煥字孔章豫章人妙達象緯識斗牛之間有劍氣屬豫章之豐城永平間張華薦補豐城令至縣掘獄基

豐城縣志

卷八 名宦

一

入地四丈餘得古劍二此亦博物精識者也

唐

柳渾字惟深一字彛曠襄州人先爲永豐令有成績觀察使表爲豐城令政如永豐而仁厚加焉後拜平章事封宜城伯

南唐

馮儀爲豐城令性廉明撫民有方有田父詣求決事凌晨飯蕨稍饑至食肆求麵久不至乃去肆家堅索麵金不與訟于縣儀飲以茶而灑桐油其中田父盡吐所食惟蕨耳肆家乃伏罪

宋

程璠字仲韞明道先生諸父也曾知豐城適江水環城
人大饑邑豪吳氏藏粟閉糶璠召諭不從謂曰民饑
且死冷亦不敢自保祿位當杖爾取之吳大懼于是
富人爭出粟民用以濟璠資識高爽有過人者凡山
川道途人物名氏目所一見耳所暫聞閱年雖多不
復忘廢爲邑三年識其民且半矣

宋咸字貫之登天聖二年進士第任豐城尉晝治夜計
推行彌密公暇且勤學好吟咏有劍池識方遊景文
爲之序

豐城縣志

卷八 名宦

二

劉韜字仲偃一字夢袞建之崇安人登宋元祐九年進
士第紹聖丙子爲豐城尉設方略勤警捕鄉邑以清
歲饑多盜他邑率以捕殺希賞韜曰此饑民救死爾
率豪右出穀賑濟躬自收卹多所全活官至資政殿
學士使金不屈死謚忠顯

楊告字道之其先漢州綿竹人同學究出身調廬江尉
改豐城主簿邑有賊殺人投屍于江人知主名而畏
不敢言告聞親往擒賊有言賊欲報怨者告不爲動
旣而乘夜欲刺告告又捕得致于法境內肅然告曉
法令頗知財利而不務苛刻時號能吏仕至右諫議

大夫

解禧字公和吉水人知豐城縣事增築新堤水不爲災以薦擢知賀州陞辭陳二事曰君德曰役法朝論嘉之

胡璉字宗偉建安人紹興年間爲豐城令築堤捍江自是六鄉皆免水患采掇邑志自爲之序文亦雄偉祀王季友于學之東序以矜式多士凡所尚者教化非尋常簿書期會所可同

劉卿月字昇叟合沙人淳祐年間出宰豐城介潔治其身簡易治其民肯綮窾輒刃往而解以隆名辨分尚禮義謹教化爲先務至之日新南維門浚湮濠建粟社廣學校百廢具舉築堤五百丈至今賴之

豐城縣志

卷八 名宦

三

元

賈全濮州甄城人宋德祐元年隆興運判廬陵劉槃以城降元諭屬邑順附市民懼而徙者什九井邑蕭然明年元帥府鑄豐城縣印授全全爲政一本仁恕慰安摩撫民以還定未幾盜發臨撫越境驅掠全單騎往救得脫虎口之危者萬計南征師過境上哨騎橫出全巡歷百方護衛居者安堵省徭役興學校復太平之觀士民相率建祠于清都觀左紀頌德政

陳元凱字時舉號損齋河東人豐城初升州元凱以行省郎中爲尹立紀綱以新民聽先教化而後刑罰經理學宮重修講堂改鑄祭器公退即單車詣學訓勉諸生從遺老話舊講求民瘼詢考政事利害得失而罷行之一時善政翕然

高復禮字仁卿河南人先以兵部侍郎使日本授中順大夫尹富州屏謝請謁戶庭闐然一小蒼頭給事左右而已凡言出如山之不可移公退閉戶讀書清儉自守饘粥外無異味始終如一以疾卒于官

郝兀兒回回人豐城縣達魯花赤明恕廉介爲政有方

豐城縣志

卷八 名宦

四

嘗有軍人舟行過境死于盜事聞省路委同知鄭某會郭招討出捕郭欲盡屠濱江民兀兒曰吾爲令長檢覆知爲河寇于民何與乃直前辨白謂不得請則將入奏郭歛兵去邑四面皆水連歲增築隄防又築墻數百丈民不告匱戶口日增產物殷阜陞縣爲州就授州達魯花赤興學崇化政教一新甚著功績完顏鐸字振之曹州人由隆興路同知除富州尹優于爲治凡處察案斷是非意見傑出改築公廳作新文廟皆不煩民

買歌畏兀兒人爲富州達魯花赤仁厚有大度嘗從學

魯齋許公手不釋卷喜書大字得古人筆意性簡直
臨民不事鞭撻不以請囑易是非

阿刺威河西人大德初授武略將軍富州達魯花赤州
境歲受水患馬湖墻衝決損田四十頃刺威至築堤
三百丈又修境內壞堤六十四處甃石禦衝水復故
道歲遂有秋

毛鐸字仲聲龍興人至正間行省署爲富州學正時土
寇李明道集衆據州治脅爲從事鐸曰我故士人肯
從爾爲亂乎明道曰若屈膝于我富貴立致鐸抗色
曰我寧折首斷不屈膝遂遇害

豐城縣志

卷八 名宦

五

明

林弼字元愷福建龍溪人登元進士第任吏部主事洪
武初奉使安南還來知縣事以文學飾政事孜孜愛
民士高其行民頌其德時比之卓魯焉有文集行于
世

何昭善字憲章浙江淳安人由人材洪武二十八年任
豐城縣丞營繕公廨學舍橋梁堤墻多其經畫陞奉
新知縣士民懷之

王英字士傑浙江仁和人正統元年由監生知縣事守
已廉靜平易近民以疾卒于官時江西按察司石璞

好善嫉惡聞英卒特設奠爲文祭之以表其行
尚禔字京福河南羅山人由進士授監察御史天順己
卯左遷豐城知縣剛毅敢爲不畏權勢時鎮守者恃
恩恣橫假進貢名民不堪其需多伐樹棄產以逃其
苦獨縣賴禔無擾焉後陞廣東僉事

李廷聰湖廣益陽人以景泰間舉人知縣事做穎有治
才會洪水衝隄殆盡勸資募力採石興工委主簿黃
燧董其役指畫詳密卒成堅堤性坦易樂與民洽識
縣民幾大半見即呼姓名無一訛者

黃燧直隸蠡縣人縣主簿成化丙戌水衝石橋墻諸處

豐城縣志

卷八 名宦

六

縣尹李廷聰委督修葺其管轄人夫有千百長各執
旗號整整不亂于程子所謂吾之董役乃治軍法有
暗合焉燧或荷擔戴笠雜衆中以察其勤惰自言嘗
見天順間塞張湫口故所爲皆有法堤成甚堅至今
賴之燧貌陋心誠有巧思居官不受民一錢凡捕盜
董役與賤者同勞每以身先之

劉璫字士約湖廣麻城人由進士授豐城知縣臨政嚴
明庭無私謁凡民間均徭徵銀等項輒印花欄票帖
明載數目給與小民令依期執帖以輸吏胥里老不
得肆其乾沒邑有給引錢每歲不下數千從前入令

私橐璲悉貯之公用修築河隄亦甚有功惜任未久卒

何洽字允仁浙江富陽人由進士初爲閩藩照磨弘治十一年來令豐公勤有爲首修學宮拓泮池創東西樓舍六十餘間造橋梁建亭館咸捐引鈔佐費築堤扞江躬督其役竟以剛直忤時調石首民不忍其去士林撮其善政十條共歌咏之

陸文博平湖人太學生爲豐城縣丞嘗督運采石中夜船忽漏文博具衣冠拜祝曰船中有一錢非法者請身葬江魚比曉起視則水草纏裹三魚塞漏處豐士

豐城縣志

卷八 名宦

七

大夫有三紀異以傳之七世孫隴其康熙中進士爲廉吏理學名儒

朱諫字君佐浙江樂清人由進士弘治十八年任豐城鋤暴植良德威兼著修河堤百餘丈功立就歲旱禱雨率諸生父老十步一拜隨致甘霖民甚德之

吳嘉聰字惟德山西鴈門人由進士正德六年任縣事材宏而敏政尚寬平邑災燬千餘家乃捐俸賑之奉檄修築土墻民不擾而事集宸濠之變士民賴以捍禦巨寇徐九齡聚衆數千于建昌之醴源嘉聰從都御史余諫督兵討之獨帥驍勇先登深入其地擒斬

賊首顏曰和等二十餘人賊敗潰多其功云

顧必字民表四川成都人登正德丁丑進士宰豐城存
心仁恕蒞政嚴明積粟至數萬石頻年水旱必發廩
減價以糶秋成糶還民賴以濟逆濠要索悉禁絕之
及叛欲加兵于豐即緝斬從逆者四十八人以徇極
力備禦境賴以安首發其變于巡撫王守仁又率兵
從討有功陞大理寺丞轉少卿

潘穎字叔愚寧海人嘉靖進士出宰豐城性通敏剛決
案牘所積如山一日盡與剖決堂下無稱冤者修葺
學宮疏浚河道剔奸釐弊頌聲載道陞南京稽勲司

豐城縣志

卷八 名宦

八

主事黜陟惟允辛卯特旨召見竒其奏對超擢郎中
未幾卒

柴璘字孟璘餘姚人由舉人正統年間任豐城教諭行
敦學優士民悅服纂修邑志饌鐘鑄銘

鄭嘉字謀遠龍溪人由鄉魁任教諭師道尊嚴教有功
效增廣學舍有記勒石陞國子助教

周鳴鶴蘇州吳縣人由歲貢弘治年間任訓導碩德博
學重義輕財為多士所推服卒于官囊篋蕭然

商大節字孟堅鍾祥人以嘉靖二年進士授邑令初縣
城北大節至力為修築又境內多盜設法捕獲幾盡

擢兵科給事中累官巡撫都御史經略京城內外訓練鼓舞軍容甚壯帝方倚任意竟爲仇鸞所陷卒于獄隆慶初贈兵部尚書謚端愍

韓弼字汝良浙江餘姚人平湖籍登嘉靖丁未進士令豐城燭隱發奸廉而威敏而信聽政多奇蹟有醉人入酒肆遺金醒忘其處詣告訊曰此無頭事誰命汝來曰禱神得筮一陽三聖即批拘酒戶楊勝三入審果有此人一訊出其金稱神明焉歷陞本府守奉檄城豐受役不聞追呼之擾雖窮鄉童白趨事子來僅三月而城成適閩廣寇至邑恃無恐士民德之有明

豐城縣志

卷八 名宦

九

公仗神武折衝千里剩豐垣之頌功詳城豐記祀生祠陞本省提學副使豐鐫去思碑又歲祀之報功祠厥後子祁任贛州府推官過豐父老咸依依左右益徵遺愛在人愈久而不泯者

王天性字則衷揭陽人由舉人任本府通判資性質直疏爽有才能初署豐城縣篆委丈田良法未盡得行民甚惜之次年復蒞豐值平豐隄決乃躬相地勢移馬湖實地僉工分丈修築堅固至今賴之晝督工于鄉夜理訟于縣吏胥肅然事罔不輯民稱無冤故邑人被澤尤深祀名宦祠係署篆未列職官志

曹大川巴縣人由進士授豐城令存心易直守已清廉雖世胄嘗有寒素氣味且幼齡老練寧拙催科不肯腴民脂膏以博聲譽受挫當道勿恤馬歷刑部主事員外卒于官豐人思之祀名宦祠

顧九思字與睿長洲人隆慶年間以進士任縣事甲戌朝覲考天下廉能第一召見會極門獎賞賜宴擢戶科給事中歷右通政

吳達可字安節宜興人萬歷間以進士知縣事愛民好士惠政清操士民建祠歌思不替擢御史巡按江西掌河南道歷太僕寺卿通政司通政使卒贈都御史

豐城縣志

卷八

名宦

十

賜祭葬道德名節朝野著稱

湯北京號質齋宜興人由進士任縣事才敏甚蒞政三月弊蠹肅清以興起學校自任爲多士所推時邑多盜摘發如神風之以廉介至今有能言其事者著有仁政錄考最擢御史士民立祠東關外祀之

徐揚先號南高江寧人由進士任萬安縣調豐城到任署聯于庭曰門庭清似水案牘重如山諸勢豪無不嚴憚之訟獄大小立剖斷尤加意堤壩馬湖熊坊諸堤至今利賴豐賦重役繁胥吏爲奸揚先稔知其弊搜剔一清比較不煩民無逋負接諸生以禮令用名

帖延見賓館亦異數也奏最擢御史臺累官太僕卿
馮起綸號弓閭浙江慈谿人由進士令豐政尚寬大尤
屬意學校立寶氣樓劍閣二社甲子鄉榜元魁及諸
得雋皆所造士也催科無擾獄訟稱平距治三四里
曰細彩灣有巨樟崩于河畔橫截河流歷歲壞舟商
旅苦之地方率烟火夫百餘人不能起綸禱于武當
行宮越數日雷雨大作挈至高岸人咸謂其至誠感
神累官江西按察使卒祀名宦又特祠祀西門外

謝文龍號橋東瓊山人由進士任縣事至之日流寇震
鄰募兵措餉寇聞不犯境丙子歲大饑首捐俸以倡

豐城縣志

卷八 名宦

十一

好義者民多全活先是漕南米立三倉一在劍江驛
前曰便民倉一在小北門外曰馮家倉一在河西曲
江磯上曰西倉歲久便民馮家二倉壞擇地之便于
收兌者合建于小東門外厲壇之右曰永便倉宏廠
堅固國賦賴焉他如建大港口石橋新衙舍關操場
買田租以資備禦施義塚以掩枯骼皆實力爲民生
地方計在任九年清操如一日以疾終士民哀之祀
其主于龍門書院

孫應嶽號游美南安大庾人由舉人署學事有偉度家
世貴顯不屑屑于贊幣士之好學者結社會文引爲

忘年友師事徐匡岳講止修之學尤擅風雅暇時同
邱見南雷瀛海諸公詩酒賡和著有前後金陵攬勝
稿累官刑部司務

徐際旦號宇白廣永豐人由舉人署學事性醇謹步趨
不踰尺度有古人風課士寒暑不少輟嚴禮法不責
餽遺與邑侯晉接毫不干以私士有貧者間分俸賙
之尋登進士授浙江仁和令

國朝

何士錦字晝生江南建德人以進士來尹茲邑時鼎革
未久流亡未集士錦多方招撫民賴底定繕城築隄

豐城縣志

卷八 名宦

十三

興學編甲無不極力經營次第就緒蒞政七載念邑
爲江省名區文獻不可久蕪爰偕紳士取邑乘大加
訂葺旋以績報最歷太原郡守

周光斗浙江海寧人工制舉業由進士爲豐令性慈祥
民有訟于庭者欵曲開導若老嫗之于弱子偶有敲
朴意惻惻不自快暇即招士子課文命題十餘各隨
其所長以文進獎拔英異周給貧寒戊子鄉試獲雋
五人俱其所造士時光斗分校闈中閱五經卷獨持
閣學臨川李紱卷嘆曰此命世才也力薦得元嗣以
奏銷稍虧議罷士民爭助千餘金代補李感知已誼

稱其賢于上官遂得脫然歸籍父老談及輒有淚下者

王履仁號漱園江南江都人康熙己丑進士己亥謁選得尹是邑精明果斷胥役不敢肆其奸先是苞苴賈緣爲途甚雜履仁至悉杜絕之決獄訟善以諧語鉤人隱情更能以諧語折人利辯人至今每樂道不置周尚中字緘安吉水人學問淹洽和易近人爲邑司訓引進士類勤于考課問業者趾接于門冷署因之而熟善吟咏與邑中士夫相倡和一時風雅大振遷金華經歷

豐城縣志

卷八 名宦

十三

劉象賢號思菴金臺人由進賢令調知豐邑重士愛民值五水泛漲決熊坊諸堤人人蒿目象賢設法修築土石之役率以身先俾底于成義學廢已久慨然興復清侵年間田租六百餘石并入龍山書院爲督課獎賚資士咸德焉有亂民自浙歸以吃齋惑愚民事發鄰省移文會武弁往捕象賢收首從數人伏法開釋無辜全活甚衆諸政悉惇大體不愧古循良吏高尚禮山西太原人由舉人任南昌令乾隆三年調署縣事公廉明幹植士撫民德愛周至每月親詣學以文酒招諸生會課談論欵洽極師弟歡徵收嚴革火

耗拆封日庫吏進短封戶名請勾取尚禮笑曰此中
豈無羨餘足均補者奈何以分釐故煩擾吾民耶不
許才善折獄經數年未結者旬月間判決殆盡人頌
神明先是縣胥隸枉法婪賄驕恣魚肉莫可制尚禮
痛懲之有余隸者尤橫暴因事斃之杖下合邑稱快
代至卸政邑有清官離任赤子失哺之謔去之日祖
送者以數千計

豐城縣志卷八終

豐城縣志

卷八名宦